

尚

綱

堂

集

尚絅堂駢體文卷一

陽湖 劉嗣綰 醇甫

答顧響泉先生書

前得報書并寄到所刻梁溪詩選二千餘年繼詩壇之俎
豆千一百家比文人之封禪西神之山二泉之水其功峻
其源深矣 本朝諸家推南沙爲第一理實而不膚味清
而不薄秋水蘊塘殆不能過近時作者於斧仙若洲二君
采錄尤備吳碑一書鮑墳再唱客鐙夜讀聲與淚俱此曹
子桓所爲逝者之痛也某孤浮江上匏繫天涯陟嶺思親
臨池憶弟自感身世思歸里門顧自高曾以來世有薄田
可遂歡養負累日深舊業遂蕩三年之券莫折一斗之粟

徒春不得已而負米四方勞薪千里豈所語於丈夫之志
者哉點春亭下歲云秋矣望淵明之三徑松菊未荒問少
陵之草堂猿鶴無恙南雲渺渺恨不奮飛略抒所懷無任
依戀

與張皐聞書

執別以來旬月軫結追維緒語篤愛良多叔向居晉能知
醜蔑之心士會去秦不忘繞朝之策古抱今情斯眷眷已
足下胸藏鳳尾談折鹿角中正克守質文互宣以此鏡別
衆流裁成吾黨嵩陽之館匪遙華陰之市將盛都門人海
品類尤雜炙手可熱盟心易寒一貴一賤翟公之所榜門
勢交量交劉峻之所著論固已堅我崖岸屏之階庭魯鐸

表其高風齊竿除其濫奏矣若乃奇振於獨氣求於同山
桂一聲岑苔並色不以榮悴易不以出處殊而六蔽未開
三益罔取終無補乎學問未足語夫性情蒙有惑焉請陳
其略昔李斯吳起別派衍於西河力牧容區傳薪極於兎
谷太邱之道宜廣河汾之教貴宏若拘守師箴堅持黨議
以矛刺盾借筆操戈輪壘攻守交肆壽張高赤異同各爭
紕繆南轅而不知北轍東向而不見西牆其惑一也圭臬
之樹儒者以之飭躬韋弦之佩風人於焉尙志如徒履製
魯風裳縫唐俗博康成之帶小子夏之冠謂可陳綿蕞以
居功擁臯比而講學則巫俗恒多禹步伶人亦託夔宗婁
敬褐者之服許議鴻臚王式博士之衣貽譏狗曲徒操僞

尺終屬虛車其惑二也朱雲之叱張禹朝廷旌其直名汲黯之數張湯道路服其公罪今之尙意氣逞譚論者攝次公之衣使灌夫之酒正平之鼓入座而卽搥安道之琴登門而輒碎是則野兕多狂山膏善罵縱無譏於桀犬豈有當於堯羊其惑三也言者心之聲也名者實之號也孔璋不嫻乎詞賦而謂風同長卿孔昭不諳乎經術而欲名齊董相詆訶作者唐突古人自蔽益深自處愈妄方且雕龍之辯出入縱橫捫蝨之談凌躐王霸語道德則關西夫子論經濟則江左夷吾其惑四也五噫之作梁鴻欲以悟君三良之篇陶潛豈嘗忘世如徒感傷時命悲憫天人口著罪言手標謗史而旨不歸於忠愛教顯悖乎溫柔韓非說

難孤憤無端揚雄反騷離憂安屬其惑五也董子曰先賢
而後文左志而右物故明體正以達用佩實乃能銜華或
者棄絕學之丹青耀虛名於朱紫魯縞齊紕徒增其文飾
朱畫吳冶競豔其浮榮則雖刻楮忘年鏤冰費日亦不過
燕客藏璞鄭人買珠葉公之好似龍何如伯樂之相真馬
乎其惑六也若夫山頭射虎李廣能飛帳下聞雞劉琨輒
舞天下事固有莊論正襟危言動色者矣設使石磯少激
竿木多頽枚臯則自以爲俳鄱陽則伊其善譁齊纓索笑
楚袖賁歡賓戲方陳客難繼作雖樂廣之談清耳匡衡之
說解頤祇足娛人無關勵世是直以儒爲戲安用以禮爲
羅其惑七也蓋源正則流清本堅則末茂友盡忠告之道

師有觀摩之方朗甫晉卿今之志士從足下遊必不至規
瑱其言鑿枘而行也特質未化氣未純耳夫孺子以取履
成名王生以結纈養重足下顧不能得此於弟子哉以水
濟水其道將窮以柯伐柯其則不遠循循善誘則吾聖人
教已僕之過歸不家食吉曩者結習茲焉日除經史而外
迺涉老莊狂狷之間可居夷惠每喧囂雜處得所鎮定蕭
寂獨居知所激發治心之要差爲得之敢告足下亦殊不
願足下之告人也願言之隱我懷如何溽暑屏軀爲道自
愛

與顧立方丈書

前留吳門听夕奉教廣文先生之舍備極平嘯詠蘇州刺

史之筵亟申其芳宴懷哉懷哉何能已已昨歸自郡城得
令弟斐瞻訃喪且返矣素旌千里虛幃七尺驚死別於青
楓悼生埋於玉樹嗚呼僕自辛丑哭學和乙巳哭傅爰今
復哭斐瞻君家昆季間天何忌之深而奪之速也僕竊維
稚歲獲交羣從依依寒暑垂十餘年談讌未終酒壚當歇
逝者之慟感咽心脾況姜家長被遽嘆長眠謝池春草不
生短夢其在令原能無愴絕惟閣下早衰之質攻苦積瘁
頭白偏親相依爲命達人觀化敢進區區昨展空齋昔遊
宛在秋藤落子猶誤碁聲古苔上階獨尋篆格竹所舊話
蘭上墜歡覽其遺編悽然泣下學和客死行篋未歸斐瞻
傅爰均有緒言上期作者雖所志未就亦足自存元方定

季方之集風流邈然楸之臨獻之之喪人琴已寂私心眷
眷良在於茲感遠存往言之於邑

山中與鮑若洲書

山中十日庭樹報秋離形絕塵曠如自遠董子云儼然獨
處惟山之意僕始得之矣故人不見城闌致隔幣款猶昨
景光迭新山木悅君而不知嶺雲怡我而誰贈顧此天繪
惜無畫圖足音窅然使人失盼夫一日之感采葛爲勞千
秋之思撫松成愴以余多恨能無眷眷山齋雖僻亦足晏
娛鐘聲上雲檐翠下雨冷泉咽其清夢瘦竹搖其古魂山
鬼宜笑時來牽蘿野狐工媚乃復拜月一燈熒然輒墮遐
想頗望足下能來同之昔人千里相思猶復命駕況僕與

足下近在咫尺。故樵風載塗。朝暮可至。幸勿令山中人停琴而久思。支筇而長望也。

與王秋塋書

寄跡宋中。獲交大雅。山木載詠。蘭襟是佩。辱連輿詣竹並馬。看花。免走木蘭之祠。鹿遊牡丹之院。古臺十里。舊雨一時。簡折鄒枚。壇傾高李。將今方昔。良爲多幸。別來半載。用感九秋。足下棠陰益繁。階草方絢。牘下如水。琴鳴有風。昔嵇中散有言。一行作吏。此事遂廢。及觀於足下。不謂然矣。僕依都下。如滯周南。屬者徙居寓園。春告暮矣。此間風景殊類江鄉。然岸柳十圍。不解留客。山桃一面。卽能笑人耳。目異觀未識。何故宅折而西。一水環帶。寬可彌畝。亘以長

橋橋東有亭闌檻相亞幽鳥隔竹如聞宮商遊魚啖花不
辨紅紫雲壑汪叟君之故人輒攜一尊來憩日暮淙雲歸
山止水遶屋頗悟齊物因知樂天倘亦浮沉人海之中跌
宕風塵之外者哉足下一官辭鄉綿歷年所側聞老屋密
邇湖莊樵蘇未替風烟猶昔鄰父瓦盆可當歌唱兒時釣
石行就畫圖仰給衣食栽百株之桑俯役奴僕足千頭之
橘一一代籌不覺神往夫人方致出谷之慕僕乃爲還山
之吟不知足下十年以來得幾僕也野人之言附博一笑
幸勗光彩毋忘德音

答陳理堂書

前歲觸暑北上接軫千里月涉於野星飯在門辱足下知

愛爲忘年交長途言笑遂忘勞頓都門日淺歡娛未足文
戰旣北驪歌遽賦此之別也祖生之鞭其投繞朝之策誰
贈非特悲離羣泣歧路而已僕車輪生角兩載於茲曳裾
之歎乃復不免夫僕素念上之冀得尺寸之階以繼堂構
下亦思竭斗石之才以追作者三十以來遽就殯喪體復
清羸近耽元言間涉梵課卽復玩弄章句如寒蟲一號窮
鳥三歎所謂自鳴其天也足下學植素豐兼峙品節培膏
希光扶質立幹仙觀之花瓊千年而不凋蠶社之水珠十
里而猶映他日名山成就倘不在古人後乎容甫之沒聞
之心慟追憶仲則少雲立方諸君俱曠世才零落若此夫
僕與足下所識不過十年二十年間耳而茂陵之稿半佚

人間玉樓之文遽歸天上王郎弔夢屈子歌巫興盡悲來
曾是不意然則過此以往知僕與足下又當何如耶古人
云行樂須及時焉能待來茲揚州煙月之地文士輻輳騎
鶴隋堤之上走馬蜀岡之顛清遊旣臻逸響斯赴有所述
造倘寄一二以爲相思之資亦一快也僕比寓公相邸第
與外城較隔潘韓二君尙未一面端人之友當如舊識耳
秋高風厲努力自愛願言之懷曷其有極

答吳枚庵書

甲寅春辱手告知足下主講瀏陽旋以楚境少甯音書不
嗣足下寄家烽火之外旅食瀟湘之南無官可居乃爲長
沙之謫無米可乞更值春陵之饑盡室播遷重以身累計

通鄉國綿歷十年昔景真繫懷於倫好孝穆眷眷於宗室
博昌父老之書不忘墟里襄陽耆舊之傳因感山邱況在
羈孤能無動念僕以乙卯之冬銜哀歸里塵事多慮饑驅
遂迫比發豫章言留鳩茲瀧岡之阡日月未卜輒思買山
十笏廬墓數椽魚菽以祀先人雞黍以奉吾母敦勗子弟
弗墜前業周旋鄰里克繼世好所願止此亦復不奢而債
臺久居舊產盡蕩魯人之田假而不歸薛公之券積而難
返坐此怏怏靡有甯日邈之上九曰肥遯無不利嗟乎今
之遯者難乎其肥矣曩者漢上之遊敷衽論心同舟申款
願言偕隱遐思卜居笑展君圖以盟息壤君好曼聲故多
逸趣微吟芳草託興湘波未敢盡其古歡竊欲圖其後會

迺尺電不留英年。颺忽津梁異軌。關隴殊塗。水有東西之
流星有參商之隔。昔年遊好。歡若平生。首路風波。幾無歸
權能不悲哉。僕別後得詩可十餘卷。頗悔少作。痛自改削。
顧學植淺力苦不逮。暇日當錄一本。質之足下。昔微之之
集待傳於白傅。敬禮之文求定於陳思。每一念及。此心怦
然。則不欲更緩也。宋金元三朝詩選。鍊精存液。可砭俗尙。
悔邨詩註刻竣否。本朝詞選尤宜付梓。以公諸世。近時實
無善本也。固結之私聊復縷縷。衡陽雁回。有以復我。

貽友人書

足下邗江之權。竊意道出鳩茲。當展良觥。比奉故人告知。
足下因舉孝廉方正。迫於歸里。足下名場坐困垂二十年。

倚問之望未知所慰竊體介母求祿之意冀遂毛生捧檄
之願足下之心亦良苦矣顧進退出處所當三思古者周
崇六行仁讓同興漢制十科賢良並策朝重端門之典世
高講幄之風大儒循吏鮮不由此方郡邑之舉也足下當
固辭不能以曹邱之揚自解於毛遂之薦也且名者實之
賓也誠使素履有孚嘉邇無悶歸厚之門昔人所旌通德
之里過者猶式如徒以名焉而已季良名流取之以誠子
弟公謹才士黜之以懲風俗彼葉公所好之龍騰笑乎公
卿羊公不舞之鶴貽嗤乎賓客由來舊矣夫人卽至哲必
不能掩已之短以兼人之長人卽至愚亦必不肯棄其所
工而用其所拙今足下旣不獲焚棄筆硯刪除詞藻就繩

墨之訓務布帛之言去文苑而入儒林舍文章而談道德則必至名實不相符言行不相顧虛車不足以行遠質鼎不足與入廟繫而無用致歎匏瓜華而不實貽譏桂樹若足下者爲麒麟之植耶爲鸚鵡之車耶僕竊爲足下不取也僕學植未成行能無算前望修途茫無所託顧以知交之雅聊盡忠告之道齊甘荼苦鑒此區區足下勿濫南郭之吹免貽北山之笑也幸甚

致汪劍潭丈書

都門過從幸奉雅教珠玉出手韋絃在身拜辭高齋瞥又一載近惟閣下興居清娛攝衛增勝落落素履翩翩華裾多士若蟻爭趨古槐雙雛比鳳不負新竹朗月延照和風

選襟雖冷官一瓊貧士四壁不足以減此清致也某去臘
旋里憂患遽集風林不靜愴何可言饑來驅人仍復浪走
春間薄遊邛上旋涉蘇杭六月之杪渡浙而東洗眼桐江
濯足嚴瀨烟唱晚合山圖展開便思挂席辭家刺船入海
飄然琴劒又滯章門數月以來心旌蕩絕斷風零雨迢迢
各天一日之思有逾三秋百年之憂顧及千載迺者南浦
始波西堂欲暮雙鬢蟬薄一身螢單樹底脫髮有安仁之
二毛風前約帶無東陽之一尺卽復驅使烟墨平章月露
淒思忽入華心易凋恐不能結秀捶芳追隨大雅也清暉
天末思之悵然敢期德音以當雜佩

與吳穀人先生書

暮春杪嚴少峯編修來知先生乞終養假旋里開北山之
草堂樂西湖之愛日閑雲出岫正其仰其孤高清泉在山
終莫方其廉潔雅望足以表羣植冲襟可以鏡清流邇者
賦閑山居避暑湖上團扇奪雪葛巾飄烟南皮之瓜浮成
鳴綠之江西園之酒汎若紅螺之海同舟李郭望卽神仙
聯吟韓孟圖爲主客顧望風流伊其翹想某溯江南下小
住鳩茲密邇故園藉圖將母顧以遭家多患閱世少閒入
此歲來淒其益甚華心頓素元髮將凋寒蟬翳葉時抱一
身之驚遊蜂釀花空貽百口之累煩憂苑結茶蓼爲懷正
恐塵海緣深名山業淺不復能肩隨大雅手挹宗風迴憶
春明佳日杖履追陪蕭寺花初燕臺月晚霏玉屑之在座

咽金絲之滿堂歲月不居人事徂謝葑亭介夫相繼下世
存歿之感時復縈懷追念昔遊因思盛德白雲渺渺龍門
之望彌極風雨瀟瀟雞鳴之感不已哀戀反側如何如何
抒管端情無任依溯

與鄒曉屏先生書

深愧仁里幸接禮門芳鄰所居陋巷斯化綠楊一樹元白
兩家之春蓬蒿三徑羊求二仲之跡承略分投贈忘年結
納陳說風義鑒別雅俗吹鄒衍之律而溫風自生傳劉向
之經而藜火代照也先生表植人倫激揚清濁養醇儒之
學問勵名臣之節概前者使車所至一莅浙中再臨濟上
乃衡文之任耳夫浙水一朝與終古爲盈虛泰山一雨視

四海爲枯潤濟世之功胥準乎是安石再出某竊附於君
生之望焉某少忝遠志壯而無成顧以上有老母未敢遽
言放廢秋水旣落當渡桑乾入洛之衣雖塵而不緇踰淮
之橘遇寒而不化某之自信此焉而已別後餐衛定復增
勝占素履以協吉頌朱絲以表直思德之永滋眷眷焉
暑炎風伏惟慎夏自愛

答吳香竹書

香竹足下辱五月二日書循覽再四慨然增離別之恨緬
維煩暑餐衛致佳寄宅古槐之南結鄰深樹之側却掃入
室懸車在門擺脫塵璫滌盪冰雪被芳露以浣筆帶清流
以洗襟是亦吾輩汗漫之鄉逍遙之界也僕寄跡江城清

風告至瑟瑟林木英英水雲借彼濁醪酬此清節亦足娛
古懷延勝覽焉顧以作者訪舊里門半成宿草山邱雪涕
時痛於囊載登天涯風雅凋喪介夫之沒又弱一个其餘
諸子滇楚從軍首塵曠絕存者萬里逝者九原目斷關河
能無於邑迺復偃仰樵牧游浪儒元冷看局外之棋閑說
枕中之夢獨何爲也僕春秋三十有五矣少不自量負黃
鶴之壯志騁碧雞之雄辯不數年來遽就湮沒名心已退
妄念漸空思欲息影元關銷聲空谷讀書養親以完我素
而時命舛錯饑來驅人甯不爲之短氣故若夫煩華流蕩
固君子所勿欽依阿泆忽亦大雅所弗尙薄俗所趨蒙竊
有惑願與足下共勉之而已秋風多厲勉謀養殯臨書恨

然詞不終幅

與吳蘭雪書

快簪雪於天邊憶吳雲於江上愁如髮積心與旌懸緬我
季重歸香蘇之山返新田之里春盤介母寒具留賓婦姑
聽脂膊之棋兒女話團圞之火重以鴻妻偕隱鮑妹同居
繡詩弄玉之樓寫韻文簫之館簾簾紙帳茗椀香爐無王
榮之七哀有啟期之三樂矣前者官閣題襟客應擁被遲
君說餅餠我題糕搗畫燭之雙條對冰文之一卷舊夢如
昨清遊已非言辭百尺之樓別賃三間之屋馬餘病骨鴻
入歸心凍水都流迴風併起樓臺不定看雪月之模糊星
漢將闌判入天之離合況復年如燕尾春到梅梢酒淺愁

深更長夢短愛而不見我勞如何風便裁書伏惟珍重

答何萬汀書

去歲從舅客某附寄一槭青鳥之使仍還翠鱗之書不達
道里悠遠山川間之也月之六日辱手書情詞篤切竝寓
諷勸且頌且感夫行百里者不亟亟於跬步憂千載者不
慙慙於旦莫松柏藏壑自成棟梁之觀雲霞在山別具樓
閣之勢足下閱歷旣周神識益長然而吾人靜躁異致取
舍殊塗不可強也見示近製數章弔蒼梧之奇攬鬱林之
勝蜃煙蜚雨犵鳥獐花狂傳青兕之呼痛甚黃塵之飲鴈
鴒叅軍能作蠻語鷓鴣才子不忘鄉音宜其抗情之哀結
響之壯也僕兩載都門傭書隱跡長安日近入海風高馬

下黃金之臺鴻歸碣石之館西笑不已南還無時豪氣坐
減遂成落寞北牕旬月溽暑未闌冰碗不涼爐山自火豆
棚七尺藤陰半牆鳥無閑暇之心蟲有小年之語三士之
桃井螯畏之而不前五侯之鯖盤蠅附之而不去此中出
處悄焉憂之僕將買櫂且浮瓜洲之瓜君倘迴鞭請折柳
州之柳也

與馬雲隄書

故山一面便挂征帆光陰往來風雨離合歸林之鳥依枝
而忽驚尋源之魚逐浪而旋失分手以來圓月數換娟娟
者蠟春桑因之成衣嘒嘒者蛸秋槐於焉擇陰時序遷矣
人事間之爲可感也近想足下避暑山麓納涼湖亭發齊

館之雅興動梁臺之清吹瓜載一艇浮成碧天荷開十里
浩若紅海二三舊侶逍遙其中亭亭雲心落落霞想誠湖
山之勝致林壑之清緣矣僕游暑于役言徑浙西孟秋之
杪始抵章水薄遊已倦且佳爲佳然而泥爪獨留蓬心孤
往秋燕如客江鷗笑人他日者略購買山之錢免修乞米
之帖得歸故里樂此餘閒周旋婦姑徵逐倫好鐙火如夢
壺尊亦僊綠坐舊墅以娛北堂碧山新社乃近東郭漁弟
同歸於好山妻亦鑒斯盟前路不迷素心長在初終之言
質之足下

答吳白菴書

夏初得手教知己赴大庾學舍報書末由君以冷官遠同

謫宦友朋之念安能置懷大庾地瘠俗顧不薄日與諸生
循循相處詠歌先王分子夏之小冠奪戴憑之重席功雖
不廣所學存焉也來書辱以古人相勗自維學淺知力凡
弱而當世君子顧欲廁之儒者之列期之風雅之任薄青
雲以蟬翼之輕嗣日光以螢火之末有以知其難也比來
每思發篋窮年肆志古籍而塵務攖其外憂思迫其內事
與願違興與境阻高山之景自崖而輒返前津之逮臨河
而罔濟夫以知非之歎俟之他日無稱之疾諉之沒世嗟
何及矣至僕之蹤跡隨遇所安同好不諒致來譏責足下
視僕豈墮冥冥之行而逐靡靡之俗者哉和光同塵乃柱
下之遺訓情恕理遣亦叔寶之微論與物無忤以全吾真

僕之自處者有在矣足下愛我甚知我深耳僕自離家又一寒暑兩弟卧病偏親倚閭勢難久客復事奔走足下一官袍繫絕意遠行回首昔遊遂如隔世歸雲在望乃厭敬亭之山折梅入手興思庾嶺之驛山川修阻相見無期情多地遐徒增惆悵

與施雪帆書

昨辱枉顧未獲復面足下裴哀古藤之陰流連枯樹之作撫景傷懷移晷乃去意致不在古人下也聞子于邁三日爲期僕裝載塗明發卽戒饑驅四方不遑朝矣夫僕與足下方其少也蕩海夷嶽之概奔雲絕霧之氣謂可以凌轢千古橫騖八極乃至側身天地投足風塵宋人之守恐失

乎寸株之地越客之射竊笑乎五步之外此亦黃鵠之在樊籠而良馬之困乎鹽車也前見佳章丰格益嚴詞旨益曠駿乎一窮通均得喪混苑枯於一致等勞逸於齊觀足下殆以東野之窮爲南華之達者乎仲則詩近爲某明府選刻去取失當昔弁山尙書欲梓其遺集久而遂寢則亦幸不幸者存乎其間也足下勉之矣吾人身不並麟鳳年不逮龜鶴同羣則牛馬爲曹屏處則麋鹿爲伍乃欲持尺寸之管以與百氏爭奇萬族競秀傳薪窮谷割席名山此則係乎師友之淵源平生之風義者也今足下之行也近不踰錢塘遠不過禹穴而僕也攜采石之酒上清風之亭相距千里而近耳異嶺之雲陰晴合乎氣候一江之水

潮汐通其消息慎河魴之出入閱沙鳥之往來如是而已
行李在門僕夫載促書此志別不備不宣

與施石樵書

石樵足下日前湖上小住清遊之暇繼以芳宴所苦良覲
未久離筵頓促在山之泉修林恣其映帶出岫之雲迴風
增其悽愴固聚散之蹟異亦勞逸之致殊也與足下別渡
江而西候潮富春揖秀巖瀨四山如畫翠滴篷底餐霞悅
魂捉月盪魄獨攜一尊以酬孤影役役昏曉悠悠山川離
家既遠鄉夢參錯桐江食魚因思建業之水泥港雪藕忽
憶石湖之菱芡風扇空渴病乃甚日甘清冷以致破腹一
夜數起披篷而出時有奇景助我壯觀火雲西流虹月東

見河漢下映皆成赤岸如是逾月方抵章門解裝以來旬
日病者溥事登覽言從江城樓當夕佳閣共秋水西山睡
起相對如沐此間賓從連興若雲亦復仿吹臺之清興追
河朔之盛事而吳質同遊從者失歡顧雍在側見者不樂
知我罪我夫復奚言歲月不居茲已秋暮寓齋兩間牆隙
新塌四面多樹昨來風聲蛩吟一鐙蟬翳半葉秋士之感
如何如何以視足下逍遙谿山跌宕文酒將冰喻炭安可
同語臨別承以靈石山樵圖屬題僕讀禮以來吟詠久輟
無以應也他日者爛柯人跡之外伐木鳥聲之中樵唱十
里隨君往來谿風兩岸送我南北足下倘有意乎前途阻
修人事錯失昨非今是其誰知之略布所懷詞不宣備

與王贊漁書

章貢一水浮來天末之書羅浮兩山斷到夢中之路目方窮於粵嶠腸忽繞於吳門承示竹枝詞載一葉之綠篷擁雙聲之絳樹人間玉暖帳裏金銷荔枝十八白肥紅瘦之年胡蝶一雙綠葉青陰之日以此儷新聲於蘭畹摘豔曲於花田雖越網千絲秦珠十斛未足方其清麗也僕也唱大江之東去乘黃鶴以飛來望遠愁深懷人景短丁山晚合千家鶯燕之聲亥市晴開萬竈魚鹽之火雖長年之小住乃來日之大難又況斑竹祠荒桃花廟古問楚天而不語弔湘水以無情蓋客中之送客方多而秋士之悲秋特甚矣曩者湖上同居月泉結社一瓢渡水雙屐尋山客來

松下敲鶴夢於碁聲人在蘆中寫漁謳於笛譜每當城頭
月上艇子烟橫鴨鴨呼名雅雅接隊折荷衣而風腸欲斷
牽蘭帶而露眼如啼清尊既開芳俎斯薦松花春糴桂栗
秋鮮朱嫂嘗羹吳姬壓盞餅說公羊之肆酒當司馬之壚
則有桃根一面菱角雙了黑黑搗箏紅紅拍譜念家山於
曲底記水調於湖頭幾家簾閣曾聽懊惱之歌何處闌干
不劃相思之字今則雪泥印在烟水痕消如燕辭家與鷗
爲客挂一帆而天遠打雙槳而年流聊復九面山迎雨頭
風送渺渺波愁君住梅花之國瀟瀟雨唱我尋蘭葉之門

與倪米樓書

米樓足下山居一枕離別須臾依遲西湖眷念良友僕於

斯時效觀化之蒙叟學忘情之太上良不欲以聚散之感
重傷足下心也僕渡江而後風來打頭富春桐廬留我旬
日緬灘而上水祇尺許十里五里篙師叫絕每遇都邑輒
有停泊市人一呼不辨雅鵲下士大笑如聞蒼蠅同舟之
人顛倒枕籍而僕且柁樓呼風篷底吸月如在湖山勝處
與足下相往還也江程帆落余月且盡南州一榻聊避炎
暑閱士千里百不得一輟沐見客動至失歡此間舊雨蹤
跡萍散綿綿天涯渺渺鄉井愛波成海情塵比獄一念自
縛彌綸兩間旬月感秋兼得肺病鬱鬱居此如何可言嗟
乎米樓僕與足下憂患旣同投契亦合僕齒愧長人事多
感朝則奔走烟墨夜則驅使魂夢側身牕櫺以就月星託

足屋宇以避風雨思欲爭雄毛角競秀動植窮天地於跬
步等古今於瞬息百世而下有如足下之知我者哉一枝
遠借巢居知風蜀坂之馭不叱而將回朝歌之車聞名而
悔入爲吾輩歌行路難耳足下方爲六月之息毋輕千里
之役前者之約良非所期秋風已淒行矣自愛

與汪籍庵書

僕與足下相聚者僅匝月相睽者祇一年而遙遙此心日
歷百劫不啻恒河之積沙漏天之補石也得手書知足下
近況並識旋里後借徐陵之筆架下溫嶠之鏡臺水流紅
而自香山掃黛而宜笑以此棲遲里舍徙倚湖天策靈岩
山人之筇盪石湖居士之樂竹雨飛翠荷風送曛阮屐一

穿郭巾再墊清遊繼燭款語停盃豈復知風塵故人登古
燕臺雪涕南望思我籍庵不置也僕春試迴避從壁上觀
車輪生角復滯都下自離鄉井綿歷五年故園之思飄瞥
成夢每一涉想如秋雨之墜空而暮雲之歸樹也僕少受
情累不早解脫一意纏綿如蠶自縛思欲懺慧業之根除
綺語之障度蓮泥之浩劫斷風絮之夙因經卷藥爐悅我
禪趣用是猛省妄念日消對虛白之半牕避輭紅於一室
不自知其都在都邑之內公卿之門也籍庵知我心哉長安
六月炎歊扇人車聲殷雷終日動地齋止十步四面紙牕
狂風一來沙颿如雨塵硯不開積至旬日饑鼠出穴時來
窺人自非倪生誰與寂處足下淹雅才蜚聲文壇高秋一

集卷二
鶚好音不遠春明之晤跂予望之長夏溽暑諸惟珍重

與倪米樓書

米樓足下霽雨異地停雲各天迢迢之思勞如何矣客歲
蕭晨曾展尺素乃雪泥鴻爪莫辨東西土偶桃人爭憐去
住古人所以有飄風之悲散雪之歎也猶憶去年繫櫂西
泠入山消暑坐畫船於天上仿水嬉於湖中朝霞暮霞殘
月新月荷花笑我菱角惱公嗟清景之須臾慨故人之寥
落僕與足下此心同之僕章門解纜遂泊中江坐卧扁舟
幾及兩月阻風中酒蕉萃何堪此間風土亦復清美而城
而西水天一色里人所稱小西湖也半郭半郊一亭一榭
時有佳士觴詠其間然而僕也中年身世小住情懷劫後

談禪因中說夢悟雲烟之了了看露電之如如隕霜之蟬
依高枝而含悽隨風之螢入深竹而屏照卽或流連烟墨
刻引宮商亦復如山陽之笛懷舊者所心傷雍門之琴感
時者爲泣下也足下年未及壯嗜古又力擢秀藝圃之中
漱芳文淵之裏遺毫作僕呼墨爲卿又何難步屈宋之後
塵追王楊之盛軌乎歲月如流茲又溽暑驗風信之離合
通潮音之上下不生不滅何古何今在在皆僕與足下晤
對時也語云君子知幾達人觀化怡情養素餘無可言

寄楊笠湖夫子書

立雪三年望風千里側聞別後逾月清遊閒停虹月之船
自訪鷗波之里閣下烟霞餐勝山水滋情迺者子舍怡雲

官齋養日仙令之縣不羨河陽之花邵公之厨不思建業
之水小年趣永暮景娛多勝可知也某荒園一畝董子少
窺破屋數間玉川多病梁春易輟墨突無烟菽水不歡稻
梁何所亦欲去鄉里辭倫好矣每憶春風撰杖秋水著書
卧亦清遊坐還小隱叅禪理以讀書雜仙心於論詩能令
公喜當顧曲而頻來將移我情竟刺船而忽去其能無到
水津迷尋山路斷也哉昨者閒過問字之亭一眺唼風之
閣白自生於虛室青只裊乎爐烟秋藤對壁狂吟一峰春
花背牆冷戀雙蝶眷此情景有懷如何茲附呈近日詩文
各數首先生有嗜痂之癖野人爲獻芹之思不自顧其意
之疎情之鄙也龍門天遠蒼波渺然杖履追隨期之何日

致吳穀人先生書

客秋馳寄一牋託朝歌之車附剡溪之櫂往而仍復洪喬
悞人也側聞杖履近作寄公選樓暢開文社迭舉繼歐陽
者七百載師元禮者五百人粲粲門子斯爲盛已伏惟闌
暑清暇益多選吹竹西之亭續騷淮南之館涼迎古苑未
夕螢流酒載長橋方秋虹倚奏懷而衆壑皆響佇賞而一
波自嬌伊古西園之遊東閣之宴不是過也某夙仰師門
叨隨末座偶託折楊之詠深負焦桐之知小住西湖一年
於此矣風花度劫烟水棲心倚竹身寒觀河而皺吟肩削
盡真入山圖詩骨涼來不離泉夢迺者月魄方盪秋魂已
銷浮白之觴罷飛閣紅之舸不至渺渺余懷悽咽彌極況

復江天日短鄉井愁長丙舍未營午橋將圯白頭老母黃
口嬌兒一身無山雞之膏全家有鴟吻之望寸心木落百
感蓬飛又安能借酒忘憂因詩作達乎計偕入都約在冬
日小春之梅既開大隄之柳將折平原留飲十日爲期所
恐輪無四角路有三叉公歸何所倘騎湖上之驢客遊未
倦空跨揚州之鶴也

答汪竹海書

兩月春明歡娛未暢流水一別浮雲不歸昆季出都當及
秋暮浮湘出粵結夢迢迢前辱來書申之後約出處去就
此復難言計僕長君一十八歲君猶茂齒僕已衰齡炎方
多燠冬橘能榮朔地苦寒春桑不葉越禽夜貉語豈同年

屬以繁憂迫而奔走一颿秋駛昨發吳門擬綴清遊以答
風日督帥適至旌旛戒途二地主負弩疾走市人之驚
乃亂大吠下士之笑如聞蠅聲遂至敗興攘臂徑過足下
度之如僕者尙能謝辟衣而易簪纓去漁笛而聽鼓角哉
足下文章上追秦漢天性伉直尤絕近今顧手已貴柔操
絃忌急僕雖不才敢忘獻納吾人榮枯雖判燥濕相關松
有悅柏之心李有代桃之戚性情之故非復區區願鑒其
愚以爲一得瘴鄉攝衛慎保清虛不盡之言嶺雲在望

答許謫船書

國門執別瞥爾成秋墜雨飄風離愁寸積歡悰致少遂踈
報書足下小住京華特耽幽素琴有在御之德基無不平

之心綠壺駐春碧幌延月庶幾古歡洽此同好南歸何日
懷哉懷哉僕居里門僅及旬月飄蕭淮海遊浪儒元勝賞
既稀清尊告謝淫淫邑邑思不可任采蘭十步空懷古香
攀桂一叢春言高隱逍遙之舉竊有遐心昨辭維揚重迫
家累茅生奉母向子婚男坐是餓驅更靡甯日清秋買櫓
行指婺州薦蒲星飯折荷露飲訪水識路尋烟知邨柁樓
歌聲不辨吳越隔岸隱隱和之洞簫憶蘭上之清遊懷蘆
中之逸侶風雅掠岸霜鴻叫天漁子一吟樵夫再歎憂思
之來不可說也行次罌脰先裁魚書明發高齋遇君於夢

與蔡浣霞書

自發南中風雲錯互離遯之感沉鬱彌襟華思頓彫瑤音

不嗣清商告節君子維宜曹務多暇定資道勝守默稀元
采眞養素弗以朱轂厭其青氍竊覽時人尠茲旨趣僕之
南下江淮告災隄岸摧魂邨墟楚囑負薪塞土迄無成功
湖身浸高河勢倒注豈惟陵谷殆歎變遷溯厥濫觴匪伊
朝夕舟艘比阻往來始絕勞歌動地呼聲殷天流民播蕩
未復邦族雁戶遍塗雉羅彌澤生涯無藉坐益窮蹙一粟
之粟侏儒捧腹三束之薪支離攘臂魯論熟火班書質錢
古人所嗤我輩不免日昨返里危坐債臺重以親知疊遭
喪故自維身世因感天人有悟向子損益之理無改休明
夷白之行榮辱等視物我兼忘惟在文章未能遽置前者
得觀述造實飲我心結義淵深抗情哀上孔氏規其粉麗

揚子惡其華丹動以言詞見君風骨音塵雖隔結想於茲
僕五十之年忽焉且至修名不立老復安能晉宗孝標有
云魂魄一去將同秋草每省斯言輒爲隕涕而二三知己
乃復期以遠到之業姑以進取之途謂不祥之金常自踴
躍不材之木見告夢寐恐不能耳比有浙中之行荻渚蘆
洲秋望寂寞霜螯獨薦南雁正飛言念故人渺在天末箋
緗勿曠幸慰懸思

答汪小竹書

一別清風佳音告慰元淑南下書悉起居自夏徂秋百端
頽喪握管再四音塵終輟自非親愛誰能諒之足下年均
終賈才塲班揚十策不窮千言可待珥彤之職諒無忝已

吾人報稱重賴文章忠愛不存風騷斯薄昔王褒獻頌不
假洞簫相如納諫豈關綠綺張平子之詞賦能議史裁谷
子雲之筆札雅規方術惟夫高義可雪虛聲顧於足下能
無厚望僕自循寡薄分遠浮榮比返征塵重爲形役江淮
災沴嗣以海氛寓目蒼黃動成浩歎維揚陳迹不無棲戀
清遊徂謝湖亭杳然密友致稀心神簡寂每欲約趣猶龍
希風柳下雌黃罔設堅白不鳴釋躁矜平與道休適所得
渺淺滋用慙焉夫嗣宗不論人過士林獻疑稚川不及人
非鄉黨貽誚況在今時豈能解免然竊見當代自好之士
厓岸過峻周甫以峭僻致累子幼以狷懃賈禍徒損於已
無益於人嘗自忖度不願以彼易此也才智旣凡迄無奇

行生平雅意惟在人倫俯仰朋儕周旋骨肉悅親信友卽
又難言志折心摧可爲扼腕足下知我筆之傳載略有未
盡故特陳之太公循績比莅何郡足下得假計及秋杪入
都後約當無遠期所恐苑枯異命出處殊方相見之惟邈
焉無日劉雲春木天各一涯迴憶昔遊追思勝侶逝者朝
露存者晨星眷望關河悲來橫集惟冀善調玉體以榮令
名哽咽裁書不能終幅

致吳稷堂侍郎啟

前得吳上舍書備述緒語望某入都因值內廷俾充記
室佇懷徽德天末神馳夫玉羞自獻非所論於卞和金諱
不祥豈能逃乎歐冶竊某潛踪塵海獲賞風檐一賦小言

遂親大雅辱山公之啟事邀水部之分箋吳江楓落崔郎
卷裏之詩隴首雲飛柳憚扇頭之畫攜揚過當塵忝良多
旣而鞭指江南夢離薊北蕭條琴劍惻愴關梁願言霽月
之思敬頌清風之德未免低徊身世眷戀音塵何敢隱情
惜已同劉勝之寒蟬匿迹冥懷類莊生之屈蠖則以遭家
多故惟士無田負米方殷飄蓬易轉以西風之席帽張南
浦之布帆幣書未卻過蘇圃而懷慙鏡具空攜向徐亭而
灑淚屬屈清節益愴中懷吳波渺渺一葉初飛燕樹蒼蒼
孤鴻不返攜子安之筆秋水極乎天長望元禮之門長安
同於日遠雲停雨墜我勞如何所望風波不滯人海重逢
焦桐爨下中郎之賞不孤春草篇中白傅之居有託臨楮

縷縷不敢多云

請瘞古冢啟

某月日余因事出城東見土人鑿地可五六尺許得古棺一白骨已露黃腸未毀不銘不碣何年何世哀哉古人盡於此日于時白楊亂嘯楓葉倒下鬼火出壙如照其歸塗神雅繞枝豈逢其舊識余以行路蓋裴裒不能去也昔西隴一墓傳爲混沌之氏東岡二棺尊以冥漠之號敬告仁里取法往者沿邨而西輦莽彌畝請於隙地爲別冢焉招魂無主之宅改卜無名之鄉齊君一丈夫之夢勿銜恨於梧邱秦皇五大夫之封將被蔭乎松隴

謝餽小猪肉啟

某史書對校。方訛渡豕之女。樂府旁搜。偶辨呼豨之字。何
來白駒。忽賜黃牼。猪不稱荅。獬寧笑艾。昔者召南。美其當
機。遼東慚其再見。雖加大蘭之錫。未設瓠葉之筵。彘肩啖
我奉斗酒。其敢辭猪肝累人。酬尺書以爲報。

謝餽鯽魚酒啟

美人羔酒。曾傳太尉之家。名士鯽魚。忽到荊州之座。枯還
待索。潤已先流。嘗丙穴而彌腴。引丁沽而不澀。醉看竹石
之圖。酒腸角出。夢憶江湖之味。魚腹書還。

謝餽雉啟

中牟令尹。不聞一邑之歌。如皋大夫。空說三年之笑。朝飛
偶唱。夏翟頻開。與扇爭輝。將裘比曜。本無心於文采。殊有

當於盤殮將學彭祖之親割竊笑庖人之代治勝公膳之
雙膏梁飽德擬侯鯖之五口腹知恩

謝惠哈密瓜啟

危星東去匏是仙根淨土西來瓜成佛果伊古瓜州之地
卽今哈密之區抱黃臺而蔓歸出青門而種遠一騎紅塵
笑荔支于唐驛千年紫塞羞蒲桃於漢宮方東賁以逾珍
儷南皮而更貴碧藕蓮花同浮玉井文鱗柳葉柳葉魚並
剖銀刀此日蟠桃鳥使須成曼倩之圖他年青李來禽肯
乞右軍之帖

索藥酒啟

朝朝飯顆客自看山夜夜酒泉誰當領郡伊釀王之善政

有麴部之名材。咨麴蘖於商賢。實苞茅於楚貢。家有大藥
之王。旨矣多矣。世無中酒之聖。清斯濁斯。僕也景升三雅
負此佳名。伯倫二豪。居然勁敵。品盤中之小。四海談座上
之大。九州願借青田以開白社。黃嬌捧盞。紅友傳觴。玉山
夜倒傾一斗。以何妨金谷晨陪。罰三升而並得。

祭吳季子廟文

昔牛斗下燭之墟。江漢遠濯之地。習僻陋而斷髮。蒙獠狂
以棲身。千人成都。三讓宅國。至德所被。迄無能名。繼自滌
壑遠遊。江上沉璧。言偃成學。里中聞歌。采風荆蠻。推木鄒
魯。而其篤產世族。流輝邦邑。繫我季子。實稱先賢。雖吳改
州。來之封漢。易延陵之號。而故邑尙存。高風莫飾。祀典所

舉久而成神則吾邑季子廟所由來也維神系出姬氏明德之後有人生於春秋世祿之家山禮不墜先人采藥之志陶希弱弟翦桐之風上紹孤竹爲百世之師近附子臧守千古之節匪弁髦乎君國迺脫屣乎富貴吳俗好鬥時方戰爭致師乎雞澤卻敵乎鵠岸塞姑蔑之旗奪餘皇之舟以致巢隕諸樊關戕戴吳勇登於堂死暴於野獨能休養禮讓光昭文明貴賢賢教洽風俗古之人歟蹈德而履善廉頑而立懦者矣或者曰禍楚者申也亂衛者郤也魯位攝隱徒開廢嫡之嫌宋視傳殤轉失知人之哲若夫難兄難弟與子與賢奄有吳土事典周道振西維之鐘鼓再見衣冠假南國之旌旗無煩荼火計不出此而纂竊

家滅亡二世屬階所在何說之辭抑知楚風不競天道潛移吳沼將成地靈亦洩祈死得死禍福之無常莫爲而爲廢興之有主金瓠偏衣城濮將興之兆當璧歷紐乾溪不復之徵鄭蔓蔓草叔段終亡晉衍椒聊成師迺大以云人事夫豈然哉或又謂人臣必誅其將君子貴防其預號牛名亂情有後圖乳虎滅宗不無先見公子光者其事類商臣而跡同夫櫟也久矣夫異念已萌陰謀早蓄履霜冰至賈曰虹成三士縱殺以二桃兩君終遺夫一矢宋襄以愛兒者守國功讓子魚衛成以疑弟者還宮罪歸歆犬骨月之際蓋難言之況爲虺弗摧困獸猶鬥苟息不能消里克之釁管仲不能弭驪刁之亂抑又何也或又謂返不討賊

良史所書義可滅親純臣無愧當日者奉使全身還朝免
難徒有枕尸之歎不聞跣足之呼君曰未暇復響之志已
虛臣罪當誅討逆之風安在則豈知靖國敗國為賈之深
心喪君有君節甥之權術蓋入宮聲罪則內援已孤赴敵
乞師則外患將至彼受嬰無助而端委立於門葉公有為
而免冒入於國者豈非緩急異時難易殊勢耶或又謂天
地清寧巢由不妨避世家國元龜圖綺且當入朝乃始則
棄室而畔既則復命而退終身不入奈越視燕抑亦甚矣
嗟乎履衛土而食衛粟子鯁所以盟心鞭楚墓而虞楚宮
申晉所為痛哭何身何世吾相吾君來還喧野愁聽鴈鴒
之謠去已違山厭聒蟪蛄之耳則其其情理亂遁迹郊墟

四海安歸一邱可老而豈忘燕幕之危戀菟裘之樂者乎
且知遠而略近者非智也察彼而昧此者非哲也以彼理
炳先幾望推達識早知夫魚腸鸞始烏喙圖終虎踞池邊
鹿遊臺下痛諸兄之無祿憂吾宗之不祀幾幾乎鬼謀曹
社神降莘墟虞臘將終魯郊已改許遷而思太岳蓼滅而
悼庭堅則又陳完易姓常存虞代之韶王子投荒獨抱湯
孫之器者矣廟之落成也爲乾隆五十五年之某月日殿
約百步廊餘十弓旣丹其楹亦聖其室此邦人士雲集響
應將於是觀禮樂焉絲竹之奏如聞乎壁中俎豆之陳兼
實乎庭下昔者壽夢之鼎已入魯封闔閭之鼓旋徙越國
吳鴻臚稽之鉤淪精大水干將莫耶之冶遺跡空山維神

英風如生廟貌斯煥坐帳猶昔棲衣不塵慶忌墮憤無其
飄揚夫差請冠遜此婉好敬升馨香虔遂瞻拜福我里士
光茲人文嗚呼死者可作問趙文叔譽之誰歸靈兮有知
配太伯仲雍而來饗

弔梁鴻文

按伯鸞名其妻曰孟光字之曰德曜而自更其名曰耀字
侯光又姓運期命意殊濶顧當時莫有識其意者竊謂霸
陵一出五噫之歌絕非漫作但爲肅宗所非故終隱耳余
梁溪人也雅慕先生竊自附於知先生者敬爲文而弔焉
緬彼東漢兮先生道藏比軌嚴陵兮改字曰光其德則耀
兮其運不昌時維建初兮俗尙善良帝實長者兮外戚勢

強國維不振兮將紊朝章哲士遠慮兮救世不遑霸陵東
出兮登岳而眺于彼京師兮五噫動調天風浩蕩兮宮闕
危隋排雲叫絕兮閭者徒告謂處明時兮胡乃悲悼亦既
長往兮樂此高蹈夫誰知先生之衷之苦兮麥秀未墟弔
禾黍兮履霜將至思陰雨兮保邦未危今猶古兮誰在君
側而不悟兮隱隱隆中吟梁父兮迢迢長沙哭賈傅兮吁
嗟國無人兮莫我聽兮匪躬之故天之命兮歷齊魯而未
可久兮且適越而入吳賴主人之有賢德兮守廡下其故
吾彼高鄭之屢徵兮羌獨遠乎空谷樂椎髻之相對兮遂
先生之初服繁何德之克曜兮翳何運之能復語留連於
身後兮甯有志而勿告于高子之西向兮友此心而尚之

彼山妻其猶未察兮疇千載而諒之嗟余里之輝映兮夫
惟先生之故也緬梁溪之澹澹兮笑清流之能誤也鑑古
鏡之朝汲兮聽寒邨之夜舂寄余懷于滅竈兮夫何地而
不容余將采蘭於溪上兮芼荇菜于溪中請盥手而陳詞
兮誦令德兮無窮于是更爲五噫之歌冀先生之悅而聽
焉歌曰逸民曠代兮噫遠志未遂兮噫寄跡吳地兮噫祀
典久廢兮噫吾師百世兮噫

告嚴子陵廟文

嘉慶乙丑八月廿有七日余往婺州道過桐廬弭櫂于陵
釣臺之下驚飈夜作沙石迸發潛蛟起立神雅舞空檣櫓
相觸舟子失色余顧而嘻曰咄咄先生何風之暴也昔者

謝翺慟哭西臺守祠嚴侶實主斯集風雪滂至林木爲悲
屬海內清晏余以孤客卽次江干靡有鬱憤晨起盥手散
爲文告於先生之廟曰先生清流之冠逸民之嗣天應其
星地激其瀨廟食斯土秀頑共仰千五百載於茲矣山高
水長草榮木茂遊覽之勝亦罔不臻蓋梅尉仙去言留壻
鄉桐君遠來共樂吾土漸漸之石粼粼之水濯纓濯足靡
所靳焉某近遊焦嶺三詔傾心昨發梁谿五噫動咏沿緣
浙水來客隴中忽冒清威致興變賴有愧雷君過延平而
躍劍敢同子羽遇陽侯而投璧昔抱瓜而墮曹娥浪沸聞
歌而應舒姑泉涌湘纍沉冤蓄蛟龍之怒伍相賜革成白
馬之悲每以貞忠形其奮激載詳出處竊獻驚疑非無大

澤之潛敢請狂風之反虛舟不觸高臺可登方將上瀆山
靈遠移邨籍樵牧先路漁釣嗣興希附高蹤更傳逸事鄙
言無狀敬告先生

重修貞女祠碑文

貞女康熙初人祠在惠山麓舊植桃數十株士女雲集靈
應若響歲久祠圯邑人將請於宰而修之夫清白守節不
隱無屈曰貞載在祀典有廢必舉也余爲文書之碑俾采
風者得觀覽焉

猗歟貞女篤生寒門芳扇空谷暉流舊邨采采陔蘭誰謂
荼苦女子十年嬰兒千古古華山下雙扉對開衣飄神舉
帳動靈來風吹碧桃雨洗斑竹野鶴不歸山鴈自哭塵筭

之碑女嬃之砧西神一片貞珉至今

祭張臯聞文

乙丑春余客京師重寓東城之心太平庵臯聞張君故居也禮朋友之死宿草不哭時距君沒蓋三年矣佇慨虛室邇哀泉路情不能制敬爲文而祭之辭曰嗚呼惟命不齊惟道無假英英夫子篤生蓋寡學測爰象功崇騷正清文式靡淵質辭野登朝簪筆實國之光經折五鹿函開九羊雍容華館逍遙廣場處和不偶在默能詳義切雲漢志棲烟霧高風翬鶴勝情翹驚惻愴倫好綢繆親故酒德貽清琴歌約素屋梁春月君牀對眠秋風首路君兆已遷庭飄蠹帙壁網塵箋重來幾載遠別千年維茲友生在昔晏語

翩若墜葉颯如寒雨影堂魂下空帷靈舉鬱夢松阿蕭神
蘭宇入子東齋開子西軒空悲鵬止尙想鴻鸞鄉流鄭學
冢表揚言臨風軫素曷禁潸潸嗚呼哀哉

吳雲士誄

桂壑秋黯蘭堂夜靡嗚呼吳子遠歌蒿里別無一稔交有
二紀述子生平德音不已萋萋詞苑鬱鬱言條書形霧散
賦格霞標風義旣臻聲華旣昭近子則市遷子則喬厥風
不淳翳俗不古疵子文貌人或子忤出門有功言去鄉土
結客燕趙尋師鄒魯子德何潛匪玉而搜子文何闡匪珠
而投薦書抑禍折簡辭鄒亦旣歸止迺誠遠遊誠遊維何
日侍母疾曰終母身勉報母德何德不克而報不卒牽裾

宛轉屬纊悽惻子之藐孤長者五歲遺言訣妻飲食教誨
子慈不終子孝不匱伊慈伊孝實康實惠嗚呼哀哉疇昔
同遊子年英英屈指今茲載悼友生子志不衰尙昂榮名
匪名之榮顯揚其聲子謂升沉人定勝數我進達言冀子
之悟子悟何速遽我先路委質浮塵遊神大素彼蟬與蛻
彼鶴與飛豈不念存所存者希曾未知命亦莫知非何非
不徹何命不幾嗚呼哀哉微之遺書白傅則慟何子之病
不我以諷元伯引樞巨卿是送何子之死不入我夢昔我
里門寥寥素心及我多暇惟子見尋清談接夕款坐移陰
如何空谷無子足音庭花慘紅池草萋碧子魂不來煙水
一白呼子不聞飯子不食請述子行使子動魄嗚呼哀哉

潘君妻周孺人誄

孺人姓周氏。鏡塘周君之長女也。生而雙環告夢。十資頒
文授書。得自女孫。學禮先乎男子。玉宇之鐫琯標姊妹琴
聲之辨絃識君臣。謝絮入戶。誇南國之新篇。周菰滿園。話
北山之故事。有閨望焉。盡教焉。年二十歸同里潘君簡齋。
次子揚烈名族選也。方其牽絲鵲夕。奉盟雞晨。洗手調湯。
然脂伴讀。金釭二等。兩影呈妍。玉鏡一臺。雙波注笑。顧潘
素羸弱。姑復患痰。孺人鹿盧在腸。連環結恨。遂乃龍飛藥
店。鸞宿女牀。肺病辭香。眉愁卻黛。桃當風而骨瘦。桂入火
而心空。孺人之病成於此矣。歲壬子簡齋牧山左之濱州。
孺人奉姑命。隨往官舍。藥竈千里。香車一羣。送歸燕之于

飛打慈鴉而忽散鏡塘憐女之病且篤也與僧行誦漢歌
濱海路月始達一拜舅室言依壻鄉晨妝尙嚴夕飯已嘆
斑竹一簣湘娥之影長離曰柰數簪織女之喪遽返潘君
以荀郎之體傷元相之神命短連絲愁長竟簾懷衛水而
獨寫羨秦樓之並仙蓋去孺人之卒數月耳鏡塘既悼弱
息兼傷佳壻雲抱日而不曉玉生煙而已寒潘郎集在早
寡鵠之篇亡齊女魂歸并哀蟬之曲斷影堂開而夢入秋
墳過而靈來以余雅託世好述其哀思授我金荃徽之彤
管嗚呼錦瑟之年隔世紅簫之地誰家青陵蛺蝶應齊思
子之臺香冢鴛鴦免立望夫之石乃爲之誄曰
舜華辭芳澤蘭表悴掌珠不還抱玉而碎翳歟淑姬令德

來佩女行書箴師儀設帨二十而嫁言歸於潘織素匹左
題紅薄韓眉圖葉借書格花看何期射雉遽兆離鸞展如
之緩扶病而語蘭息一絲藥烟半縷見舅從姑呼耶送女
之子于歸涕零如雨翳山之左實海之濱六月徂暑千花
不春玉臺拜月金谷步塵傷哉新婦忽此陳人夫以喪歸
故山返葬曾不踰時英英彫喪魯市迸哀齊亭虛望佳婦
佳兒夜臺隨倡猗嗟女士儼爾千秋嬰兒瑱撤幼婦碑留
光光貞石鬱鬱長秋輝茲懿行勿闕山邱

重修專諸塋銘

邑之柳巷舊有專諸塋高不及丈築牆圍之歲久墻圯塋
亦漸壞石幢欹側瓦甃零亂鳩吻穿屋龜趺臥階其築之

年月邑志缺如也維我吳俗蔚興先賢延陵之讓國碑留
十字春申之好客廟食一方君乃生自堂邑遇諸吳市著
形熊背比力烏獲其言曰屈一人之下伸萬人之上是則
椒邱決戰河神眇其一目魯陽返戈義御退其三合氣不
能下志不可奪已宮門夾鉞窟室伏甲蕢不舉晉牙能亂
齊不殊蒼鷹之擊變生乎殿上豈有黃鳥之殉哀臨夫穴
中迺精應乎天義暴乎野俠骨斯在英風未衰悲石闕之
長銜願金身之不壞夫荆卿之里酒人悲歌豫讓之橋國
士流涕況近在此邦厥基已古市卒走拜里巫來會衆將
鳩工並請立石魯壁且破吳閭正開東門抉目來伍員江
上之潮北邙招魂傍要離冢邊之樹銘曰吳宮火散蘇臺

沼沒一旦魚腸千年馬骨亭亭翠堵在室中央此都人士
觀者如牆靈威響應亦旣覲止勇士之生禮子之死禮子
以拜神燈不油潛虬夜吐燭子來遊龍光妙光對出天表
題雁罷秋貫虹猶曉劒冷越水鉤飛吳霜願子魂兮來塲
之旁